

Berita Minggu, Ahad, 3 Disember, 1978

# DR. M: JANGAN TERPENGARUH AJARAN KARUT

BANGI, Sabtu — Timbalan Perdana Menteri, Dato Seri Dr. Mahathir Mohamad, mengingatkan umat Islam di Malaysia berhati-hati dan tidak terikut ajaran karut yang disebarkan oleh pihak tertentu yang mengaku sebagai Saidina Abu Bakar atau Imam Mahadi.

"Ada pihak yang memperalatkan agama dan Tuhan untuk kepentingan diri atau kumpulan dengan ajaran karut yang tidak berasaskan agama Islam.

"Ada ada pula yang sudah sampai ke peringkat merancang keganasan dan rebutan kuasa sebagai cara yang diarahkan oleh agama," kata beliau sewaktu merasmikan seminar 'Islam di pusat-pusat pengajian tinggi Asean' di Universiti Kebangsaan Malaysia.

"Agama Islam sedang mengalami zaman yang segar dan ramai penganutnya

mempunyai minat yang kuat untuk menjalankan hukum-hukum Islam dengan sepenuhnya."

Tapi dalam keadaan yang sama, katanya, ajaran yang salah juga mudah diterima dan dikembangkan dan ini dapat dilihat dari berbagai kegiatan yang terdapat sekarang.

Seminar empat hari itu anjuran Fakulti Pengajian Islam UKM serentak Bulan Dakwah yang dilancarkan oleh Perdana Menteri, Datuk Hussein Onn, semalam.

Ia bertujuan antara lain untuk mengkaji dan meneliti kedudukan pengajian dan pengkhayatan Islam di pusat-pusat pengajian tinggi di negara-negara Asean.

Dato Seri Dr. Mahathir dalam ucapannya turut mengingatkan pusat-pusat pengajian tinggi di negara ini memastikan bahawa perkembangan pelajaran dan fahaman salah serta tindakan yang berasaskannya tidak berakar umbi di kampus masing-masing.